



Siaran
AKHBAR
KEMENTERIAN PERTAHANAN MALAYSIA

MOD.100/2/1/2 JLD 5 (73) 04/08

**TIMBALAN MENTERI PERTAHANAN SANTUNI VETERAN ANGKATAN
TENTERA MALAYSIA DALAM PROGRAM PEDULI VETERAN
DI SEKITAR NEGERI PAHANG**

PAHANG, 28 Ogos 2023 - YB Adly bin Zahari, Timbalan Menteri Pertahanan hari ini telah melaksanakan Program Peduli Veteran (PPV) di sekitar Negeri Pahang yang turut diiringi oleh Timbalan Ketua Pengarah, Jabatan Hal Ehwal Veteran (JHEV) Angkatan Tentera Malaysia (ATM), YBrs Encik Sophian Isswandy bin Ismail dan Pengarah JHEV ATM Cawangan Negeri Pahang, Mej Khairul Ashinar bin Azid @ Aziz TUDM.

Dalam program PPV kali ini, YB Adly telah meluangkan masa menyantuni veteran-veteran ATM di sekitar Pekan, Beserah dan Kuantan. PPV yang dilaksanakan ini merangkumi lawatan kebajikan ke atas veteran ATM serta waris tanggungan yang mengalami sakit kritikal dan memerlukan rawatan serta veteran yang mempunyai anak Orang Kelainan Upaya (OKU). Lawatan kebajikan YB Timbalan Menteri Pertahanan kali ini dimulai dengan mengunjungi veteran ATM yang terlantar kerana strok akibat darah tinggi iaitu Lt Kol Salleh bin Mohamad (Bersara) berusia 53 tahun di Kem Batu 10, Kuantan. Veteran baru sahaja menamatkan tempoh perkhidmatannya di dalam kor Rejimen Askar Melayu Diraja pada 17 Jun 2023 yang lalu dengan berpencen. Beliau mempunyai lima (5) orang anak hasil perkongsian hidup bersama isterinya, Puan Roslina binti Ahmad dan veteran merupakan penerima bantuan lampin pakai buang.

Seterusnya, YB Adly menyantuni veteran ATM yang sedang terlantar iaitu Encik Abdul Malek bin Salleh berusia 79 tahun di Taman Tas, Kuantan. Veteran yang merupakan bekas anggota berpangkat Prebet pernah berkhidmat di dalam Kor Perkhidmatan Diraja selama 15 tahun serta tidak berpencen. Beliau yang menghidap strok mempunyai tiga (3) orang anak hasil perkongsian hidup bersama isterinya, Puan Shamiah binti Md Jid berusia 74 tahun. Veteran hanya mempunyai pendapatan sebanyak RM 980.00 sebulan hasil daripada pencen Jabatan Perkhidmatan Awam dan telah disyorkan sebagai penerima Bantuan Sara Hidup (BSH) berjumlah RM300.00 sebulan.

Lawatan kebajikan kemudiannya diteruskan dengan menyantuni anak veteran ATM yang telah mengalami kebakaran kediaman di Kampung Rumbia, Beserah dimana 5 orang anak veteran ATM, Allahyarham Abd Rani bin Mat merupakan OKU. Allahyarham yang merupakan bekas anggota tentera tidak berpencen berpangkat Lans Koperal dan isteri telah meninggal dunia. Allahyarham merupakan penerima BSH berjumlah RM 300.00 sebulan.

Seterusnya, YB Timbalan Menteri Pertahanan melawat anak-anak yatim veteran ATM di Taman Seri Mahkota Aman, Batu 11 yang telah kehilangan ayah dan ibunya pada Februari 2023. Allahyarham yang merupakan bekas anggota tentera berpencen berpangkat Flait Sarjan telah meninggalkan 5 orang anak. Anak sulung Allahyarham berusia 21 tahun telah diamanahkan untuk menjaga empat (4) orang lagi adik-adiknya di mana dua (2) orang daripadanya sedang bersekolah.

Lawatan kebajikan diteruskan ke rumah veteran ATM di Taman Seri Mahkota Aman, Batu 11 iaitu Encik Apandi bin A.Hadi berusia 60 tahun. Veteran yang merupakan bekas anggota berpangkat Sarjan pernah berkhidmat di dalam Kor Jurutera Elektrik dan Jentera Diraja selama 15 tahun serta tidak berpencen. Beliau yang menghidap penyakit darah tinggi mempunyai 5 orang anak hasil perkongsian hidup bersama isterinya, Puan Zaidah binti Tamjis. Veteran tidak bekerja dan hanya bergantung kepada bantuan pendapatan daripada anaknya sahaja. Anak ketiganya merupakan mahasiswa OKU yang sedang mengambil *Doctor of Philosophy* (PhD) di Universiti Malaysia Pahang Al-Sultan Abdullah (UMPSA).

Selain itu, YB Adly turut mengambil peluang mengunjungi usahawan veteran ATM yang berjaya di dalam bidang keusahawanan iaitu Encik Abu Samah bin Osman berusia 77 tahun yang mengusahakan tanaman sayuran tempatan di Pekan, En Nordin bin Aladin berusia 54 tahun yang mengusahakan makanan sejuk beku Anasaji di Taman Indera Sempurna, Kuantan dan En Paiman bin Ramlan berusia 56 tahun yang mengusahakan penternakan kambing, produk salai serta perkhidmatan urutan dan bekam di PPRS Pinggiran Putra 3, Kuantan. Selain bertanya khabar, turut diselitkan penyampaian sumbangan sagu hati dan bakul makanan kepada veteran yang diziarahi serta penyampaian *plaque* penghargaan kepada usahawan yang dilawati.

Pada 13 Julai 2023 (Khamis) yang lalu, YB Timbalan Menteri Pertahanan telah melancarkan Program *Reskilling & Upskilling* Veteran ATM (PRUVET), salah satu usaha Kementerian Pertahanan untuk memartabatkan kerjaya kedua veteran ATM dalam bidang keusahawanan. PRUVET ATM yang dilaksanakan melalui Perbadanan Hal Ehwal Bekas Angkatan Tentera (PERHEBAT), berperanan sebagai pemudah cara dan penghubung bagi menyalurkan insentif keusahawanan.

PPV pula merupakan antara inisiatif madani Kementerian Pertahanan dalam merealisasikan pelaksanaan dan halatuju Kertas Putih Pertahanan (KPP). PPV akan memastikan kebajikan dan kesejahteraan Veteran ATM terus terbela dan sentiasa terpelihara sejajar dengan jasa bakti dan pengorbanan Veteran ATM terhadap keamanan dan keselamatan negara. Melalui program ini, lebih ramai Veteran ATM yang terkesan dapat disantuni bagi mendengar sebarang luahan mereka secara bersemuka. Kementerian Pertahanan beriltizam untuk terus komited dalam mempertingkatkan lagi siri lawatan kebajikan yang akan datang agar tiada Veteran ATM yang tercicir daripada menerima insentif yang disediakan.

Lawatan YB Timbalan Menteri Pertahanan diakhiri dengan sesi dialog bersama sebelas (11) Persatuan Veteran ATM Negeri Pahang di *The Awangan Palace*, Kuantan. Pada program tersebut, YB Timbalan Menteri Pertahanan telah turut menyerahkan sumbangan 500 kotak Rahmah kepada Persatuan Veteran ATM Negeri Pahang untuk diagihkan kepada veteran ATM.

Sebarang pertanyaan berkaitan lawatan boleh hubungi Pegawai Staf 2 Media (Udara), Unit Komunikasi Strategik, Kementerian Pertahanan Malaysia, Mejar Ezrie Hanif bin Yussof TUDM di talian 017-254 0477 atau Ketua Unit Komunikasi Korporat JHEV, Encik Muhammad Izzat Siraj bin Mohd Iyas Zainal Ravi di talian 017-965 3755.

-TAMAT-

“MALAYSIA MADANI”

“BERKHIDMAT UNTUK NEGARA”

“PERTAHANAN NEGARA TANGGUNGJAWAB BERSAMA”

Kementerian Pertahanan Malaysia
28 Ogos 2023

